



La'o Hamutuk nia Solidariedade ba Povu Palestina

29 Agostu 2024

Sofrimentu naruk ne'ebé Povu Palestina hetan husi Izraél. Povu Palestina ne'ebé defende sira nia direitu no hakarak termina an husi Izraél husi oho, tortura no okupante ilegal ba povu Palestina nia rai dezde 1947, kontinua la hetan sira nia direitu. Iha funu naruk ne'ebé akontese iha tinan barak to'o ohin loron, povu inosente sai vítima, labele asesu ba saúde, eskola, no hetan blokeia ba supply nesesidade loron-loron nian. Povu sira la livre hodi espresa sira nia diretu. Funu naruk ida ne'e, kuaze comunidade vulneravel to'o labarik ki'ik sai vítima; Agresaun militar ba Povu Palestina to'o violasaun boot no agora halo jenosídiu ba ema sivil sira iha Gaza.

Depois Hamas hahú nia asaun hodi kontra ataka ema sivil sira iha Izraél Outubru 2023, sofrimentu husi povu rua entre Palestina no Izraél grave liu tan, ema Palestina liu rihun haatnulu mak mate no liu rihun sianulu sofre kanek. Situasaun ne'e obriga comunidade besik tokon rua tenke halai sees an husi sira nia hela fatin iha area Gaza tanba hamlaha no iha tempu hanesan labarik inosente sira labele asesu ai-han ho nutritivu.¹ Governu Izraél harahun ospital, uma, no eskola sira, no blokeia assisténsia umanitária esensial atu tama iha Gaza – krime kontra humanidade. Situasaun sira hanesan ne'e hafraku liu tan Povu Palestina no akontese iha tinan barak nia laran. Izraél dezloka populasaun iha Gaza dala barak; agora laiha fatin seguru iha Gaza, no povu atu ba ne'ebé?

Media internasionál sira sempre relata vítima sira; bomba harahun fatin públiku, hahú husi fatin ba reza nian, hospital, eskola, to'o comunidade sira nia hela fatin: lakon oan, lakon fen, lakon la'en, lakon riku soim loron ba loron inklui mós Izraél oho jornalista barak; agora laiha jornalista estrangeiru iha Gaza. Kuaze ema 70% ne'ebé mate mai husi parte fetu no labarik ki'ik sira, ne'e krime boot, sidadaun hotu-hotu iha mundu ida ne'e, iha direitu ba moris no goza, maibé ema sira iha rai Palestina la hetan ida ne'e.

La'o Hamutuk kondena maka'as asaun barbarismu no jenosídiu ne'ebé Izraél no mós Hamas halo ba ema sivil iha Palestina, no mós Izraél, solusaun di'ak liu atu forsa rua ne'e hapara funu ho imediatamente (*cease-fire*) no konkorda hamutuk tuir ho diálogu ida no termina ba estadu rua (*two-state*) ne'ebé nakonu ho Paz hodi Povu Palestina no Izraél bele moris ho Dame hanesan nasaun viziñu ho hakmatek, hanesan Timor-Leste ho Indonézia.

¹ United Nations, The Question of Palestine, <https://www.un.org/unispal/document/six-months-of-gaza-war-statement-by-the-humanitarian-coordinator-for-the-occupied-palestinian-territory-mr-jamie-mcgoldrick/>, 06 Maiu 2024

Nasoins Unidas Tenke Foti ona Asaun Imediatu

Nasoins Unidas (UN) no nasaun boot sira hanesan; Estadus Unidus Amerika, Inglaterra, Kanadá, Olanda, no nasaun sira seluk, hatene momoos saida mak akontese iha ne'ebá, violasaun ba diretu umanu tinan barak nia laran. País boot sira tenta ignora no husik povu bain-bain kontinua mate-mohu, sira kontinua taka matan no hateke liu hodi la fó importánsia. Mais piór liu tan bainhira nasaun dezenvolvidu sira hanesan EUA, UK, Alemaun, no Italy,² ne'ebé konsiente no kompriende di'ak liu kona-ba direitus umanu, maibé sira kontribui hodi apoia no fornese armas funu nia hodi kontinua fó sofrimentu ba Povu Palestina. Konsellu Seguransa iha Nasoins Unidas ne'ebé iha responsabilidade hodi asegura Dame no Paz entre país sira, seidak halo asaun efetivu no la fó prioridade atu termina sofrimentu husi povu rua ne'e enfrenta.

Hanoin fila-fali, iha tinan barak nia laran UN la konsege foti asaun imediatu hodi hakotu okupasaun ilegál Indonézia iha Timor-Leste bainhira ema rihun atus ba atus mate mohu ate balu nia jersaun lakon tanba hetan oho hotu husi tropa Indonézia, ne'ebé iha tempu ne'ebá hetan mós apoia husi Estadus Unidus Amerika, Austrália no nasaun sira seluk. Iha rezisténsia naruk ne'ebé Timor-Leste halo hodi termina nia ukun rasik-an. Iha rezisténsia naruk iha tempu ne'ebá, maske nune'e Timor-Leste nunca halo ataka ba sivíl husi Indonézia no lori luta armada to'o iha territóriu Indonézia. To'o ikus Timor-Leste termina duni ditadura Indonézia durante tinan 24, husi estratéjia oi-oin liu husi Frente Armada FALINTIL, Frente klandestina no diplomata ho apoia husi ativista solidariedade internasionál sira. La'o Hamutuk hanoin katak Povu Palestina tenke iha mós estratéjia, atu labelle sakriifika povu inosente sira.

Populasaun tokon 2,15, hela iha Gaza no *Integrated Food Security Phase Classification* informa kuaze 96% comunidade sei hasoru in-seguransa alimentaria aguda to'o iha fulan oin, no krize sei kontinua sa'e,³ tempu ne'ebé hanesan, Izraél impede no blokeia povu iha Gaza hodi hetan supply ai-han, ai-moruk, no bee moos ba sidadaun sira. Signifika, bainhira ataka naruk ne'e kontinua, situasaun iha ne'ebá sei sai piór liu tan.

Nasoins Unidas tenke foti asaun imediatu atu evita situasaun ne'ebá sai aat liután; UN tenke fó sansaun todan ba nasaun sira ne'ebé kontinua fornese kilat hodi oho ema Palestina. Violasaun direitus umanus iha Palestina tenke hapara. UN iha responsabiliza tomak ba sofrimentu ne'ebé ema husi nasaun rua ne'e hasoru.

Timor-Leste nia Afirmaun ba Respeita no Defende Direitu Soberania

Povu Timor-Leste iha esperiénsia enfrenta sofrimentu naruk iha okupasaun ilegál Indonézia; Agresaun militar, torturasaun, violénsia sexual, blokeia comunidade ba asesu ai-han no kria moras oi-oin ba comunidade iha territóriu Timor-laran tomak. Situasaun iha momentu ne'ebá lori Timor-Leste kompriende di'ak sofrimentu naruk ne'ebé agora da-daun povu Palestina enfrenta. Timor-Leste iha prinsipiu ida hodi defende maka'as ba demokrasia no

² BBC, Gaza War: Where does Israel get its weapons, <https://www.bbc.com/news/world-middle-east-68737412>, 06 Maiu 2024.

³ IPC - *Integrated Food Security Phase Classification*, GAZA STRIP: IPC Acute Food Insecurity Special Snapshot, 25 Juñu 2024

direitu umanu inklui direitu komidade iha mundu tomak, hanesan konsagra iha Konstituisaun Repúblika Demokratika Timor-Leste (KRDTL) ne'ebé hateten iha artigu 10.1 *“Repúblika Demokrátika Timór-Leste mós solidáriu ho povu hotu-hotu ne'ebé luta ba libertasaun nasional”*. Iha 23 Abril 2024, Governu Timor-Leste afirma dala ida nia pozisaun *“Timor-Leste apoia direitu povu Palestina no Izraél nian atu moris iha sorin-sorin, ho pás, dignidade no seguransa”* profunda Timor-Leste nia kometimentu ba defende ema hotu nia direitu ba soberania.⁴

La'ó Hamutuk apresia ba Governu nia deklarasaun no La'ó Hamutuk hano in katak, Timor-Leste tenke sai parte ba povu husi país rua ne'ebé enfrenta hela sofrimentu naruk durante ne'e. Nune'e Timor-Leste liu husi Governu prezisa foti no halo deklarasaun ida ne'ebé liu ida ne'e hodi ezije atu Governu Izraél tenke hapara ona aktu ne'ebé lori Povu Palestina terus no sofre iha tinan barak no tenke ezije Estados Unidos no rai seluk atu hapara imediatamente fornese armas ka apoiu diplomátiku ba Governu Izraél, hodi termina ona sofrimentu iha Palestina. Hanesan deklarasaun ne'ebé S.E. Primeiru Ministru Xanana Gusmão hato'o liu husi enkontru parseiru dezenvolvimentu sira iha maiu, “... ema barak prezisa hetan solidariedade kle'an ba no apoia husi komidade internasionál. Husi komidade sira iha Syria to'o Yemen, husi povu Palestina to'o Myanmar, no husi povu Ukránia, to'o iha Sahrawi – nasaun barak tebes, balu haluha, balu iha luta maibé ho silénsiu ba liberdade no dignidade!”⁵

La'ó Hamutuk nafatin ho nia pozisaun ba defende direitu ema hotu ne'ebé hetan violasaun, prinsipiu internasionál ba direitu umanu, no direitu ba auto-determinasaun. Iha 2009 La'ó Hamutuk ho NGO sira seluk foti ona deklarasaun no diskute ho Xefe UNMIT inklui Gabinete Prezidente no Embaixada Estadu Unidos atu respeita lei umanitária internasionál ne'ebé bandu no ataka ema sivil, inklui husu ba Estadu Unidos Amerika atu hapara apoia militar ba Izraél.⁶ Iha 2017, La'ó Hamutuk ho asosiasaun no klubur solidariedade kontinua fó nia solidariedade ba Palestina no hakarak kontinua afirma dala ida tan nia pozisaun ba defende no respeita direitu umanu ba ema hotu, no direitu ida-idak nia soberania.⁷

Ami ezije Governu Izraél no nia apoiante sira atu hapara imediatamente sira nia violénsia kontra povu iha Gaza no West Bank, no hahú prosesu negosiasaun sériu atu atinje solusaun ho estadu rua.

A luta ba dame no direitu umanu kontinua!

⁴ Governu Timor-Leste, Deklarasaun Timor-Leste nian Kona-ba Konfliktu Izraelo-Palestinianu, <https://timor-leste.gov.tl/?p=37465&lang=tp>, 23 Abril 2024.

⁵ Diskursu Primeiru Ministru Xanana Gusmão iha Enkontru Parseiru Dezenvolvimentu Timor-Leste https://timor-leste.gov.tl/wp-content/uploads/2024/05/PT_-_Discurso-PM-no-TLDPM-17.5.2024-final.pdf, 17 Maiu 2024

⁶ La'ó Hamutuk, Solidariedade Timor-Leste ba Povu Palestina iha Gaza, <https://www.laohamutuk.org/War/09PalestineStmt.htm>, 19 Janeiro 2009

⁷ Asosiasaun dos Ex-Prisioneiros Políticos no Klubur Solidariedade Timor-Leste fó parabéns no solidariedade ba Prisioneiro Polítiku Palestina, 6 Juñu 2017 <https://www.laohamutuk.org/Justice/2017/TLSolidPalesPrisJun2017te.pdf>